

Na osnovu člana 20. stav 6. Zakona o vodama ("Službene novine Federacije BiH", broj 70/06) federalni ministar poljoprivrede, vodoprivrede i šumarstva donosi

## **PRAVILNIK**

### **O MINIMUMU SADRŽINE OPĆEG AKTA O ODRŽAVANJU, KORIŠTENJU I OSMATRANJU VODNIH OBJEKATA**

#### **Član 1.**

Pravilnikom o minimumu sadržine općeg akta o održavanju, korištenju i osmatranju vodnih objekata (u daljem tekstu: Pravilnik) utvrđuje se minimum sadržine općeg akta o održavanju, korištenju, osmatranju i postupanju u slučaju kvara ili havarije za vodne objekte vodnih objekata za koje je ovim Pravilnikom utvrđena obaveza njegovog donošenja.

#### **Član 2.**

Pored izraza navedenih u članu 4. Zakona o vodama ("Službene novine Federacije BiH", broj 70/06, u daljem tekstu: Zakon) i definicije vodnih objekata iz člana 13. Zakona, izrazi upotrijebljeni u ovom Pravilniku imaju sljedeća značenja:

1. "održavanje vodnog objekta" označava redovno održavanje vodnog objekta, odnosno vršenje radnji, mjera i aktivnosti kojima se osigurava tehnička ispravnost vodnog objekta i opreme uz taj objekat;
2. "korištenje vodnog objekta" označava rad (pogon) objekta za namjene za koje je izgrađen;

"osmatranje vodnog objekta" označava redovno ili povremeno osmatranje vodnog objekta putem posebnih instrumenata i opreme za osmatranje i vizuelno osmatranje.

#### **Član 3.**

Opći akt o održavanju, korištenju i osmatranju vodnog objekta (u daljnjem tekstu: Plan pogona i održavanja) donosi se za sljedeće vodne objekte:

1. zaštitni vodni objekti: nasipi, odvodni tuneli, brane sa akumulacijama, retenzije, ustave, crpne stanice, obodni i odvodni kanali i drugi pripadajući objekt, ukoliko zaštitni vodni objekt ima opremu i uređaje kojim se može izazvati promjena režima voda;
2. vodni objekti za navodnjavanje poljoprivrednih površina preko 100 ha: brane sa akumulacijama, vodozahvatne građevine, crpne stanice, dovodni kanali i/ili cjevovodi, ustave i drugi pripadajući objekti i oprema;

3. vodni objekti za korištenje vodnih snaga (hidroelektrane): brane sa pripadajućim objektima i opremom i akumulacije, vodozahvati, dovodni objekti (tuneli, cjevovodi i kanali), strojare, odvodni objekti i drugi pripadajući objekti i oprema
4. ribnjaci površine preko 1.000 m<sup>2</sup>, ukoliko imaju opremu i uređaje kojima se može izazvati promjena režima voda.

Plan pogona i održavanja se obavezno donosi i za višenamjenski vodni objekat ,ako mu je bar jedna od namjena navedena u tačkama 1-4. stav 1. ovog člana.

Vlasnik, odnosno korisnik vodnog objekta koji nije naveden u stavu 1. ovog člana dužan je, u skladu sa uslovima propisanim vodnom saglasnošću, odnosno dozvolom, vodni objekat namjenski koristiti, održavati u funkcionalnom stanju, osmatrati i adekvatno postupati u slučaju kvara, havarije kao i u slučaju vanrednih okolnosti (period velikih voda, period suša, zemljotres, nestanak pogonske energije i sl.).

#### **Član 4.**

Planom pogona i održavanja iz člana 3. stav 1. ovog Pravilnika vlasnik, odnosno korisnik vodnog objekta utvrđuje radove, mjere, postupke i aktivnosti za održavanje, korištenje i osmatranje vodnog objekta, način i uvjete za izvršavanje tih radova, mjera, postupaka i aktivnosti u redovnim i vanrednim okolnostima (period velikih voda, period suša, zemljotres, nestanak pogonske energije, havarija na objektima i opremi, planska sanacija, rekonstrukcija i remont objekata i opreme i slično).

Ako je dva ili više vodnih objekata funkcionalno povezano u sistem, za sve vodne objekte tog sistema može se donijeti jedinstveni Plan pogona i održavanja ili pojedinačni Planovi pogona i održavanja koji moraju biti međusobno usaglašeni.

#### **Član 5.**

Plan pogona i održavanja priprema se u skladu sa uvjetima propisanim u vodnoj saglasnosti, odnosno namjenom objekta, vrstom i veličinom uticaja vodnog objekta na režim voda.

Planom pogona i održavanja obuhvataju se svi glavni i sporedni dijelovi vodnog objekta, odnosno građevinski objekti, hidromehanička, elektro i tehnološka oprema, skladišta i deponije opasnih i štetnih materija, sistem transporta i veza, oprema za mjerenje količina zahvaćene vode, oprema za mjerenje kvantiteta i kvaliteta ispuštene vode, hidrološke stanice za registraciju (mjerenje) hidroloških podataka od značaja za rad vodnog objekta, uređaji za mjerenja za posebne namjene i slično.

#### **Član 6.**

Plan pogona i održavanja sadrži naročito:

1. Šematski i situativni prikaz u pogodnoj razmjeri vodnog objekta sa položajem i karakteristikama:

- opreme (zatvarači, ustave, ventili, pumpe, turbine, elektrouređaji, dozatori i slično) čijom se direktnom (automatskom ili daljinskom) manipulacijom mogu izazvati promjene režima voda,
- uređaja i opreme za odgovarajući monitoring (mjerjenja stanja) u procesu rada vodnog objekta i hidrološki monitoring voda na čiji režim utiče ili može uticati vodni objekat,
- sistema i sredstava veze (telefon, radiostanice i sl.),
- sistema i sredstava za osiguranje i čuvanje vodnog objekta i opreme;

2. kratak prikaz rada vodnog objekta sa mogućim manipulacijama opremom i uređajima kojima se može izazvati promjena režima voda;

3. pogonske, hidrauličke, hidrološke i druge uvjete (vodostaji, proticaji, pritisci i slično) pri kojima se vrše odgovarajuće manipulacije opremom na vodnom objektu;

4. nadležnost, način izdavanja i provođenje naloga za manipulaciju opremom, kao i obaveza izvještavanja o stanju na objektu;

5. popis opasnih i štetnih materija (hemikalija) i postupak sa hemikalijama koje se koriste za rad vodnog objekta ili koje služe za rad drugih objekata, a koje mogu dospjeti u vodotok, u pogledu uskladištenja, čuvanja, manipulacije, korištenja i drugih aktivnosti, sa naznakom da li je vlasnik odnosno korisnik donio plan koji obrađuje postupanje u slučaju akcidenata, ako se radi o subjektu koji je Pravilnikom o akcidentima obavezan da isti donosi;

6. postupanje na vodnom objektu i opremi u toku i poslije vanrednih hidroloških i drugih događaja (zemljotres, havarija i slično);

7. mjere, radnje i rokove za vršenje redovnog održavanja vodnog objekta;

8. način, elemente i rokove osmatranja (oskultacije) vodnog objekta, opreme i neposredne okoline;

9. program monitoringa koji obuhvata način, elemente i rokove vršenja monitoringa voda koji uključuje zahvaćene količine za korištenje voda na vodnom objektu (količina i kvalitet), ispuštene vode iz vodnog objekta (količina i kvalitet) i monitoring izvorišta odnosno recipijenta;

10. rokove i način pregleda (kontrole) rada objekta, opreme, naloga, manipulacija opremom, poduzimanja radnji održavanja, hidrološka i druga opažanja koji se moraju evidentirati, način evidentiranja podataka (dnevnik objekta) i način njihovog čuvanja radi osiguranja trajne mogućnosti uvida u sve podatke i stanja na vodnom objektu;

11. nadležnosti za evidentiranje i ovjeru podataka o vodnom objektu;

12. način osiguranja i čuvanja vodnog objekta, mjere onemogućavanja za neovlaštene manipulacije opremom na vodnom objektu, kao i način evidentiranja zapažanja i rada na obezbjeđenju vodnog objekta;

13. potreban broj, kvalifikacija i radno iskustvo radnika za rad na vodnom objektu i upravljanje vodnim objektom, uključujući i definiranje slučajeva ograničenja ovlaštenim radnicima za manipulaciju opremom.

Odredbe iz stava 1. ovog člana odnose se na redovna i vanredna stanja na vodnom objektu.

#### **Član 7.**

Donošenje Plana pogona i održavanja ne isključuje obavezu vlasnika, odnosno korisnika vodnog objekta da postupa u skladu sa posebnim propisima.

#### **Član 8.**

Plan pogona i održavanja donosi organ upravljanja vlasnika, odnosno korisnika vodnog objekta.

Izuzetno, ako je vlasnik pravo upravljanja i korištenja vodnog objekta prenio na drugo pravno lice, Plan pogona i održavanja donosi organ upravljanja pravnog lica na koje je preneseno pravo upravljanja i korištenja vodnog objekta.

#### **Član 9.**

Stupanjem na snagu ovog Pravilnika prestaje važiti Pravilnik o minimumu sadržine općeg akta o održavanju, korištenju i osmatranju vodoprivrednih objekata ("Službene novine Federacije BiH", broj 18/07).

Planovi pogona i održavanja za vodne objekte doneseni po propisu iz stava 1. ovog člana, ostaju na snazi i poslije donošenja ovog Pravilnika, a rok za njihovo usklađivanje sa ovim Pravilnikom je dvije godine od njegovog stupanja na snagu.

#### **Član 11.**

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

MINISTAR

**Šemsudin Dedić**

Broj \_\_\_\_\_

\_\_\_\_\_ 2019. godine Sarajevo